

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 320 del 11/02/2026

Vor bintsche zait iztase gehaltet dar trèff zbisnen in Schaffar von Govèrne vodar autonome Provìntz vo Tria, von Vorarlberg un vodar Baviàra

Arge Alp, gem naüge kraft in alpinar raum

[Cimbro] Di alpinar redjongen, siänka azza gehöarn in mearare State, vennense vil vert zo haba gelaichege problème. Vor daz sèll vor bintsche zait in okasiong von trèff "Presidio Arge Alp" – dar organìsm boda innhaltet di istituzionàln vortretar von drai lentar boda hãm di vorsitarung vodar arbat Kamòuschaft, bodase hãm gehatt 'z djar pellar un bodase bartn hãm 'z djar darnå, Vorarlberg, Trentino un Baviàra – izta khent geredet von sèll boma sait drå zo tüana un von prodjèkte boma sait drå vürzovüara.

Di alpinar redjongen mochan gian vürsnen z'soina dar platz boda khemmen gemacht hërta naüge sachandarn vor di firmen un vor in turismo, ma da mochan, in da gelaichege zait, khemmen geschützt zo halta hërta a hoacha qualitét von lem vor soine pürgar. Dar alpinar raum in di djar boda khemmen o bart hãm mångl vonar guatn stratedjì boda zuargitt zo maga ånemmen pezzar di problème boda vürkhemmen, asó hatta khött dar vorsitar von Vorarlberg un vorsitar vo Arge Alp Markus Wallner, un no, izzar vürgånt zo khöda, ünsarne lentar mang krescharn lai azta in djungen khinten zuargètt a zuarkhemmane bodase sik azpe protagonistn. Daz earst vo allz izta mångl zo sterchra in sektor istrutziong un dena mochtma arbatn hërta mearar un hërta sterchar pittnåndar in alle di sektör, ditza gebat zuar in laüt boda lem in alpinar raum z'soina mearar boroatet vor daz sèll boden paitet. In trèff hãmnda genump toal vo baitom dar vitzvorsitar vodar autonome Provìntz vo Tria Achille Spinelli un vor di Baviàra dar Staat Minister. Eric Beißwenger.

Enerdjia un djunge soinz di prioritét vodar vorsitarung Vorarlberg. Vor earst soinda di zboa naüing prodjèkte vo Arge Alp "EigenAlp" un "A redjong merar raich vo oportunitét vor khindar un djunge" boda soinz augelekk von Vorarlberg. Dar prodjèkt vo Arge Alp "European Talent School", vürgevüart vodar Baviàra iz a djarega initziatìf boda gitt vèrt in djungen talente; 'z mangda nemmen toal 48 djunge boda khemmen von redjongen boda gehöarn atz Arge Alp. In progråmm vodar arbat kamòuschaft soinda vürgelekk tagung übar enerdjia un groaze vlaischrèzzar.

Arge Alp in an arbat kamòuschaft augelekk atz 12 von bimmat von djar 1972 atz Mösern, in Tiról, pinn zil z'arbata übar tème boda ågian alln un boda innvånk schiar 26 mildjü laüt. 'Z nemnda toal in Arge Alp, 'z Taütschlånt pinn Frai Stato vodar Baviàra, 'z Österraich pinn Länder Vorarlberg, Tiról un Salzburg, 'z Beleschlånt pinn zboa autonome Provintzan vo Poatzan un Tria un pittar Redjong Lombardia, di Svaitz pinn Kantöü Graubünden, Saknt Gallen un Tessin.

Allz bastada iz zo bizza venntmaz atz www.argealp.org.

Übarsetzt von Schaltarle vor di zung von Toalkamou vodar Zimbar Hoachebene

(cdt)